

10 OCT 1996

Mahathir-Budaya

UMNO MENGUBAH BUDAYA ORANG MELAYU, KATA MAHATHIR

KUALA LUMPUR, 10 Okt (Bernama) -- Umno telah mengubah budaya orang Melayu dan membentuk budaya baru untuk mereka sehingga bangsa yang dahulu hanya boleh menanam padi dan menoreh getah sekarang boleh mengeluarkan barangan canggih dalam kilang yang moden, kata Perdana Menteri Datuk Seri Dr Mahathir Mohamad.

Perubahan budaya itu hasil daripada gerakan reformasi bangsa Melayu yang berkesan oleh Umno sehingga daripada bangsa petani muncul bangsa industri dengan nilai-nilai hidup yang berbeza dan lebih sesuai dengan pembangunan negara dan persaingan bangsa-bangsa lain, kata Presiden Umno itu ketika merasmikan Perhimpunan Agung Umno di Dewan Merdeka Pusat Dagangan Dunia Putra hari ini.

Beliau berkata kemajuan yang dicapai oleh Malaysia bukan sahaja kerana dasar-dasar Kerajaan tetapi yang utamanya kerana perubahan budaya Melayu dan Bumiputera lain yang dibawa oleh Umno.

"Sebelum adanya Umno, orang Melayu sanggup dihina dan dijajah. Ummolah yang mempengaruhi pemikiran orang Melayu sehingga mereka berani bangun menentang penjajah yang mereka telah pertuankan dahulu," kata beliau dalam ucapan lebih sejam yang tertumpu keseluruhannya terhadap isu dan trend dalam Umno, masa depan orang Melayu di tengah-tengah gejala politik wang yang menular dalam parti.

"Keadaan orang Melayu dan Bumiputera lain pada waktu ini sudah berubah. Tidak ada lagi yang menyoal kemampuan kita mentadbir dan membangun negara kita. Kita dapat buktikan bahawa pentadbiran kita bukan sahaja jauh lebih baik daripada pentadbiran penjajah dahulu tetapi lebih baik daripada kebanyakan negara lain termasuk negara maju sekarang," katanya.

Dr Mahathir berkata orang Melayu yang kononnya tidak faham ekonomi, perniagaan dan perusahaan, kini bukan sahaja dapat membangun ekonomi negara dengan begitu tinggi tetapi dapat menjadi contoh dalam pengurusan ekonomi kepada negara-negara lain.

Kini, Bumiputera yang dikatakan tidak tahu berniaga, yang cuma mampu menjadi "Ali" dalam perkongsian "Ali-Baba", memiliki dan mengurus firm-firma canggih yang maju jaya, bermodal berbilion ringgit dan meraih keutnugan yang setanding dengan firm-firm antarabangsa.

Mereka mampu membeli syarikat-syarikat milik bukan Bumiputera bahkan milik orang asing di luar negara.

Beliau memberi contoh dalam bidang perbankan dan telekomunikasi, penerbangan dan industri motor, Melayu dan Bumiputera setanding atau mendahului kaum-kaum lain di Malaysia.

"Dan banyak lagi kejayaan yang dicapai oleh Melayu dan Bumiputera kerana reformasi budaya yang diusahakan oleh Kerajaan pimpinan Umno sendiri," katanya.

Perdana Menteri berkata Umno bukan sahaja parti politik yang memberi peluang kepada orang tertentu mendapat jawatan dan tempat yang tinggi dalam negara.

"Umno bukan sahaja semata-mata bertujuan untuk memerintah dan membangunkan negara ini. Umno adalah lebih daripada semua itu. Umno adalah suatu gerakan reformasi atau gerakan pembaharuan bangsa Melayu dan Bumiputera yang lebih mampu dan berkesan daripada mana-mana gerakan reformasi yang lain.

"Sama ada kita akan dapat menebus maruah kita atau tidak, menjadi bangsa yang dihormati dan dipandang tinggi oleh bangsa-bangsa lain di dunia

atau tidak, dan menjadi satu daripada bangsa maju atau tidak, bergantung kepada reformasi budaya yang telah dan akan dibawa oleh Umno," katanya.

Beliau memberi amaran bahawa jika Umno gagal membawa reformasi ini maka orang Melayu terutamanya bersama Bumiputera lain akan kembali dihina dan diperhambakan.

"Saya yakin tidak ada seorang pun daripada ahli Umno yang ingin kita kembali kepada keadaan orang Melayu semasa dijajah dahulu. Bahkan kita tidak pun ingin melihat kembali kepada keadaan kita sebelum 1969, waktu kemerdekaan kita agak kosong kerana kita masih menjadi bangsa yang mundur, tidak berilmu dan tidak berjaya dalam apa bidang pun selain daripada politik," kata beliau.

Bagaimanapun, Dr Mahathir berkata prestasi negara, prestasi Melayu dan Bumiputera lain belum sampai ke puncaknya atau kepada tahap yang boleh menjamin ia dapat dikekalkan tanpa diawasi dan dipelihara oleh Umno dan kerajaan pimpinan Umno.

"Kita belum betul-betul maju. Kita sedang melalui proses kemajuan. Kita masih rapuh. Jika digoncang, kita akan retak, pecah dan jatuh berkecai."

Masalah keruntuhan akhlak dan gejala sosial seperti mendera anak dan membuang anak, menurutnya, sedikit sebanyak berpunca daripada kemewahan hasil perindustrian dan penghijrahan dari kampung ke bandar.

"Budaya kampung berbeza dengan budaya bandar. Di kampung kita tidak jauh daripada keluarga dan sahabat handai. Kita tidak bebas membuat sesuka hari kita. Kita tahu malu."

Tetapi di bandar pula semuanya berbeza kerana orang hidup dalam masyarakat yang tidak kenal siapa, dengan yang menjadi kawan dan rakan ialah mereka yang sebaya dan di mana minat dan nafsu adalah sama.

Mengenai reformasi orang Melayu dan Bumiputera lain, Perdana Menteri berkata proses itu belum selesai kerana banyak lagi yang perlu dilakukan dan banyak yang telah dikenal pasti dan dirancang.

Tetapi semuanya ini tidak akan dapat dilaksanakan jika Umno tidak mempunyai pemimpin yang jujur dan ikhlas bukan sahaja untuk hari ini tetapi untuk masa akan datang.

Katanya pembangunan mental dan fizikal, pencapaian dalam bidang ilmu, seni, pembangunan ekonomi, sosial, politik dan bentuk-bentuk bangunan serta kemajuan kejuruteraan semuanya akan mencerminkan tamadun Melayu/Bumiputera baru.

"Budaya yang telah kita bentuk sekarang belum dapat menjamin kualiti pemimpin-pemimpin kita. Budaya kita hari ini belum mampu menegakkan Tamadun Melayu Baru," katanya.

"Inilah reformasi yang hendak diusahakan oleh Umno untuk menyusuli reformasi yang Umno telah jayakan sehingga kini. Sudah tentu banyak lagi yang perlu dikaji, dihalusi, disemak dan dipupuk sebelum budaya baru orang Melayu dan Bumiputera lain dapat menjelma, sebelum terbentuk Tamadun Melayu/Bumiputera dan Islam Abad ke-21 yang diiktiraf dan disegani," katanya. -- BERNAMA

AU MAI NMO